



Siverth K. Heilmann
Atassut

UKA 2021/50
27. oktober 2021

Illup sananeqarneranut akiusup minnerpaaffissaata inatsisitigut aalajangersarneqartup appartinneratigut pisortat inissiaataanni attartortikkani ineqarnermut akiliutip appartinneqarnissaanut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinik iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneru inatsisartunut kingusinnerpaamik juli 2022-mi agguaanneqassapput.

(Inatsisartunut ilaasortaq Erik Jensen, Siumut)

Siunnersuuteqartoq inatsisartuni ilaasortaq Erik Jensen Siumut, aalajangiiffigisassamik siunnersuuteqarninnut qujanaq, imatullu Atassummiit oqaaseqarfigissavarput.

Pisortat inissiaataanni attartukkamiittarneq pigilersinnaanagulu, tassaavoq namminerisamik illuuteqalersimagaanni pitsaanerpaaq. Taamaattumik Atassummiit illoqarfinniuppat nunaqarfinniugaluarpalluunniit namminerisamik illuuteqalersinnaanissamut politikikkut illersugarilluinnarparput. Pisortat kisimik inissianik illunilluunniit sanaartortuunnginnissaat, illuutileqatigiit andelsboligforening-imik taasakkagut massakkullu sanaqateqarluni illuliortiternerit, inoqarfinni illoqarfinnilu mikinerusuni inerisarneqarneri naleqqussarfigineqarnerilu Atassummiit tapersorsorluinnarparput.

Aap taamanikkut Namminersornerullutik Oqartussat inissiaaterpassui massakkullu aserfallassimaqisut naalagaaffimmiit tigusimasagut, ineqartut akiliuteqartarnerannut ilungersuatitsineq annertoqaaq. Nunatsinni Inissiarpassuit iluarsarnissaannut kinguarsaasoqanngippat akissaarunneqartarput isaterillu ikinngitsut aqqusaarsivagut. Oquk najugaqartut peqqinnanneqisoq atugaasarpoo, akigitinneqartut qaffakkaluttuinnartut aammalu najugarissallugit kajuminnaangaarmata, avataaniik sulisussanik nutaanik pissarsiniaraluarluni ajornartorsiutit amerlaqaat.

Siunnersuuteqartoq ilumoorpoq, kommuunet namminerisamik attartortittakkanik il il sanaartortitsisaratta, aserfallatsaaliinermullu inatsisit malillugit pisussaaffeqarneq nakkutigineqarnerunera malunnartarluni.

Namminersornerullutik Oqartussat soorlu (BSU) illuutaanik taaneqartartunik allanillu, ukiunik aalajangersimasunik piumasaqaatinillu naammassinnissimasunut, iluarsartuussinissamat 100.000.- kr tikillugu matumalu kingorna qaffanneqarnikuusumik qinnuteqartarnerat 100 % taarsersugassaannngitsumik periarfissiisarnigut atorluarneqartarput.

Soorunami inissiani ineqartut akiliuteqartarnerat appariartuinnarnissaa angorusunnaraluaqaaq. Sunaluunniilli nutaajunerminiit pisoqaliartortarmat aserfallatsaaliinerillu pisariaqarluinnartut akeqarlutik, taamaattumik iluarsartuussinissamat procent-imik aalajangersimasumik immikkoortitsisoqartarpoq, tamatigulli malinneqarneq ajornera eqqaareerparput.

Maniitsumi ineqartut inissianik akisussaaffeqarnertik paarilluarneqarnissaannik aserorterisarnerullu annikillissarnissaa siunertaralugu, ukiorpaalunni peqatigiiffeqarneq ajunngivissumik ingerlanneqarnikuunera eqqaatsiarpara. Pisortat akornanni suleqatigiilluartoqaraanngat akisussaaqatigiinneq inerititaqarfiusarpoq, unittoortoqaraangalli ajoraluartumik ineqartut akiligassatigut il il sunnerneqarluttarput.

Taamatut oqaaseqarluta siunnersuuteqartup Naalakkersuisut, pitsaaqutinik ajoqutinillu siunertaqarnera ilalerlutigu, ataatsimiititaliamut susassaqartumut ingerlaqqaarnissaa Atassummiit inassutigaarput.

Qujanaq.